



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 8

Yangia anidakangma :

f Tir Yimiyim

ig tiryimiyim@aolima

yt tir yimiyim

TAPAK 7

Modric aser Real Madrid na tenangzüktepba yanglushi

Nawaz Sharif ano Pakistan ato kilonser akumtsü akok



VOL. XX NO. 254 (ADOK 254) DIMAPUR SANGTENNÜ (TUESDAY)

AAMI (JUNE) 27, 2023

₹ 5.00

Nagaland nung mezüngbuba HIV-1 Viral Load Laboratory lapokogo

Dimapur, June 26, 2023

(TYO): Naga Hospital Authority Kohima nung Nagaland nung mezüngbuba HIV-1 Viral Load Laboratory lapokogo.

June 26, 2023 nü Commissioner & Secretary H&FW aser NSACS Chairman Y Kikheto Sema, IAS-i laboratory lapoktsü.

India ya UN SDG nung sign asür rongnung ka lir aser 2030 tashi nung AIDS epidemic agientsü alizüing lir, ta Kikheto Sema-i ashi.

"NIMSR Teaching Hospital (NHAK) nung mezüngbuba HIV-1 Viral Load Lab amenokba ya Nagaland state atema kanga dang tongtipang lir aser People Living with HIV (PLHIV) tajungba nung anepalutetsü" ta pai ashi.

"Nagaland nung tanga anepalua aruba PLHIV 12,290 shi lir aser ano nisung aika lir. Linük nung HIV positive teimtiba aliba state tanabubaji Nagaland lir aser India nung Antenatal Care teimtiba lir anungji asenok atema tayongzükba jenti lir" ta Kikheto-i metetdaksü.

Temang anepalua arurtemi küm nung khenbosa viral load testing asütsüla. Viral load ajema mekümbra mozü agi mapa meinyakba sayur anungji tanga treatment ka nungdaker, ta paisa ashi.

"Item tayongzükba atema Nagaland nung viral load testing

machine ka kanga nungdaka liasü kechiyong Mumbai, RIMS Imphal-i blood samples tendangtsü atema bener yok. Talisa Covid wara mapang state adena blood samples belenshiba nung timtem jentia ajurua liasü" ta Kikheto-isa ashi.

Manipur nung tensa mejungi akümba ajanga tesüiba ita ana tashi RIMS, Imphal dangi Viral Load samples bener meyokteti arur, ta paisa ashi.

Iba Lab ya anogoshia lapoktsü aser state ajunga atema Viral Load Testing sütetsü ta paisa shisem.

Kikheto-isa Project Director Dr. Akuo Sorhie aser NSACS ketdangsurtemi mapa tajung inyakba atema tenüngsang agütsü aser NACO-i viral load machine agütsüba atema pelaba metetdaksü.

Director (M&E) Dr. Akuo Sorhie-i okila jembidang NACO dang pelaba aser Kikheto lenisüba kübok ano mapa tajung ka inyaktetba indang ashi.

"Shirangertemi timtem ajurua aliba koktetogo aser laboratory nung inyakertemi kanga anepalua amshitsü mepishir" ta Principal Director, H&FW Dr. Vibeitunuo M Sachu-ia ashi.

Küm 20 tashi onoki Nagaland nung laboratory ka amenoktsü takhangba agüja arur tanü asangsang nung atalokba atema pelar, ta NNP+ President Lanu Aier-ia ashi.

Changtongya-Longleng lenmang atema metetdaksür

Mokokchung, June 26 (TYO):

NH 702 lenmang nung anentsüh oktobka maparen tera tajungba aküm nung Changtongya - Longleng na tsungta Light Motor Vehicles (LMV) garitembo anepdang 6:00 ako nungi nikong 6:00 ako tashi jajatsü melar, ta Mokokchung Deputy Commissioner, Thsuvise Poji-i 26th June, 2023 nü sangdong ka

ajanga metetdaksüogo.

Anentsüh aluba tesemtem ajangdang akok tashi gari anirtemi kanga kümdangtsüla aser tsüngsang majungdangbo item tesemtem ajanga mesenzü tajungba asütsü. Iba den ano anentsüh aluba tesem anasaji garitem anena mayutsüla, ta Mokokchung DC-isa metetdaksü.



June 26, 2023 nü Dimapur Airport nung Airport Director-i Nagaland Chief Minister Neiphiu Rio dang airport ulushitsüba indang sentong lemsatepdang agiba noksa angur. CM Rio-i Dimapur Airport ulushitsü atema süoki ia bilemer aser Dimapur Airport Director-i March 2024 tashi nung iba mapa renemtsü ta ashi. (Dimapur, June 26)

Drugs achirtem ya ozüing alema inyaker masü shirangertem

Kohima, June 26, 2023

(TYO): Nagaland nung International Day against Drug Abuse and Illicit Trafficking amongdang drug achirtem ya ozüing alema inyakerterem ama masü saka shirangertem ama anepalutsü tayongzükba agütsüogo.

Iba anogomong ya Social Welfare Department, Nagaland Baptist Church Council (NBCC), NNagaDAO, State Level Coordinating Agency (SLCA) aser Kripa Foundation yaritepa Capital Convention Centre Kohima nung among.

"Nagaland nung nisung pezü shia katibo drugs achiba osang ya kanga süoki ia bilemstüba onük ka lir. Asenoki küm aika iba khuret atema inyaka arur saka khuret tuluba dang akümer. Asenoki drug abuse anema inyakba maparen meyipa reprangshimsü nungdaker" ta Chief Secretary J Alam-i ashi.

"State aser Centre sorkartemi azioktsü merangaka Narcotic Drugs & Psychotropic Substance amshir aika aliba ya tibelemstü ulura. Nagaland ya drugs yangludak masü saka Myanmar nungi Manipur adena drugs shibelenba tesem ka lir" ta pai ashi.

"Asenoki mozü terara ayokertem masü saka mozü shibelener tetsüdi pua temerenshi tulu agütsütsüla. Yamaji inyak nung dang asenoki iba khuret atema süoki ia inyakba osang sangoktsütsü" ta Alam-i ashi.

"Drugs shibelenba ayokertem aliba ajanga drugs achirtem adoker anungji aser drugs achirtem bendanga mamshitsüla aser timi anepalutsüla" ta paisa shisem.

"Telok balala aser Social Welfare department Nagaland indang osangtem ajanga Nagaland nung drugs achir aika

lir saka nisungtemi drugs ayokertem jungkai adoka memetdaksür" ta Director General of Police, Rupin Sharma-i ashi.

"Asenoki drugs achirtem ya ozüing alema inyakerterem ama masü saka anepalu nungdaka shirangertem ama züngshitsüla. Drugs anema rara ya police indang tebilemstü khuret dang masü saka nisung ajaki shilem agitsüla. Nübertemi drugs shibelenba osang sangoktsütsüla" ta Rupin-i ashi.

"Nagaland police-i telungpur teloktem aser NGOs dena teyari ajak agizüktsü saka nenok sasa ozüing mapa meinyaktsüla" ta paisa ashi.

Khristan state ka asünung drugs achiba ajanga tamajung bentsür aruba osang arogoi prokshitsü mepishir, ta DGP Rupin-isa ashi.

Nagaland Police-i yakta Mobile App ka sayatsü aser iba ajanga drug traffickers aser users osang agütsütetsü, ta paisa shisem.

"Nagaland police-i 'War against drugs' mapa tenzükba sülen state police 10 tema rehabilitation center nung yua lir. Parnok karbo mozü shibelenba putet aser parnok sasa nangzükba ajanga rehabilitation center nung ayu" ta paisa metetdaksü.

Iba sentong nung Social Welfare Department Secretary Martha M. Ritse-o okila jembidang "drugs achir aika bendanga amshir aser iba ajanga parnok temang aser tekolok nung kongshir aser nungdaka teyari mangur" ta ashi.

National Level Survey Report 2019 ajanga Nagaland nung substance users 6,24,000 aliba sayur. Iba nung tanur 1,11,000 aser tetsür 26,000 lir, ta Ritse-i ashi.

Eastern Nagaland dang 'Frontier Naga Territory' ta ajatsü akok

Dimapur, June 26, 2023

(Agencies): Eastern Nagaland nung atema osang tajung ka lir aser ibaji India sorkar aser Eastern Nagaland Peoples' Organisation (ENPO) tsüngda "unique arrangement" atema tangatettep kati aruba lir.

India sorkar aser ENPO tsüngda ketdangsubaren balaka asütsü mulungtepogo aser iba administrative structure dangji 'Frontier Naga Territory' ta ajatsü akok ta ENPO osang ka ajanga angazüker.

ENPO-i Frontier Nagaland ta ser state balaka akümtsü takhangba agütsü saka ibaji India sorkari magizük. 2011 nunga Nagaland Legislative Assembly-i Eastern region atema autonomous council ka tentettsü

shidang saka ibaji ENPO-i magizük.

Tang jembitepba administrative arrangement nung elected members 40 aser nominated members 9 alitsü aser iba nung legislative, executive aser financial autonomy adentsü, ta osang ajanga ashi.

India sorkari administrative structure tasenba kübok Department 45 bener aittsü mulungogo aser Eastern region nung secretariat balaka amenoktsü. Maneni, additional Director General of Police ka shimsü.

Iba atema Memorandum of Settlement (MoS) ka nung sign sütepba sülen küm ka atema interim body ka tentettsü ta osang ajangasa ashi.

Tan ita ENPO aser Ministry

Tetsürtem aser tanurtem aika aliba atema Department-i parnok asoshi de-addiction centres lapoktsütsü tebilemba lir, ta lai ashi.

Union Ministry of Social Justice and Empowerment-i gap district ajak nung de-addiction centres lapoktsütsü alizüing lir aser iba atema NGOs-i eAnudaan ajanga apply asütsü akok, ta Ritse-isa metetdaksü.

"Mapang talangka drug addiction ya lokti nung temenen mapa ka ta dang züngshia aruogo saka tanü drug addiction aser dependency ya shirang ka ta ajitetogo. Anungji asenoki iba tangatetba nung inyaktsüla aser drugs achirtem bendanga mamshitsüla" ta NBCC general secretary Rev Dr Zelhou Keyho-ia ashi.

"Asenoki drug free state ka kümdaksütsü mera agidang asenok reju ajak akangshitsüla" ta pai ashi.

"Asenoki kibong tashi itshitsüla aser tsüraburtem nem tesayuba agütsütsüla. Lokti nung temenen agientsü atema yimsüngtem nung aliba rejutem tashi aittsüla aser school tem nung tenük yoktsüla" ta Rev Keyho-isa ashi.

"Arogotemia pulpit ministry nung dang temulung magütsütsüla saka kidang, yimdong aser mapa inyakba tesemtemi arogo bener aotsüla. Nisung ajaki sorkar ketdangsubaren tashi itdaksütsüla aser asenok külemi loktiliba tajungba kümdaksütsü merangtsüla" ta paisa ayongzük.

NNaagaDAO President & Kripa Foundation Director, Abou Mere-ia state sorkar dang public health; Substance Abuse Prevention and Treatment, HIV prevention aser harm reduction nung temulung agütsütsü tayongzükba agütsü.

of Home Affairs (MHA) tsüngda senden aiben menogo. MHA-i jaokba ama June 16 nü ENPO president Tsapikiu Sangtam-i anir züngsem 12 agi akümba teshimtet telok kati Union Home Secretary Ajay Bhalla den ajurutepa liasü.

ENPO teshimtet telokisa June 17 nü interlocutor aser special adviser MHA, AK Mishra den-a ajurutep.

ENPO-i yakta Centre sorkar den senden amentsü aser iba sülen Memorandum of Settlement (MoS) nung sign asütsüba anogo lemtettsü.

Külen, Nagaland state sorkaria June 30, 2023 nü Autonomous Council atema consultative meeting ka amentsü jatepa lir.

COVID-19 mapang ajangshibatem lemsatepa liasü



Dimapur, Aami/June 26 (TYO): Momentum Routine Immunization Transformation & Equity project ajanga local NGO partner ISRN den lungjemer meta talang nung COVID-19 vaccinations takok ngua agütsütetba project atema tentüngsang agüja "Learning and Experience Sharing Meeting" sentong ayongzüka liasü.

COVID-19 vaccinations mapang ajangshibatem lemsatepba sentong nungi sorkar aser danga development partners nungi tongtipang nisungtem dena liasü.

Iba sentong nung nüburtem nungi jembiba, photo gallery walk aser COVID-19 vaccination angazükba indang sensaksem liasü.

"Alima ajunga nung iba tashidak wara ajanga nüburtem dak kanga sashia kongshi aser tajemzükba jenjang nung alir dak tali kongshi. Ajisüaka Nagaland nung COVID-19 vaccination campaign mapang state team aser nüburtemi bendanga agütsür inyaka tajemzükba jenjang nung alirtem nema temolung agüja liasü," ta Asangla Imti, Commissioner and Secretary, Department of Health and Family Welfare, Government of Nagaland ajanga ashi.

Government of Nagaland ajanga iba project den lungjemer nüburtem, education department aser NGOs teyaritip nung iba maparen inyaka liasü. Parnok lungjemer vaccine agitsü osang anibelem mesüi prokshia liasü. Yamaji lungjemer inyakba ajanga osang prokshiba nung tawa adokba süngtsü aser nüburtemi vaccine agia liasü, ta lai ashi.

Vaccination drive takok ngua agitetba atema jembidang, "Asenok lungjemer inyakba ajanga COVID-19 vaccination nung alizüng tajung tongteta Nagaland nung tajemzükba jenjang nung alirtem nem mozü agüja liasü," ta Dr. G.K. Soni, Project Director, Momentum Routine Immunization Transformation & Equity Project ajanga ashi.

"Ki sema jajaba, Deobarnü vaccination camps ayongzüka, tamangba yimsü dak sendakba lenirtem nem shilem agidaktsüba aser mela-mela vaccine agitettsüsa camp tem amenokba ama sentong yangluba ajanga nüburtem iba tashidak den kanga junga rarartet. State sorkari COVID-19 vaccine agütsüba nung yariteptsü asoshi onok nem maongka agütsüba asoshi Nagaland state sorkar aser

USAID dang pelar," ta pai ashi. "Nagaland aser Meghalaya nung COVID-19 immunization campaign nung project team aser vaccine agütsür temi bendanga agütsür inyakba nguogo, aser parnoki iba tashidak menatsü mela-mela aliba aser tajemzük jenjang nung aliba nüburtem nem vaccine agütsütet. Vaccine agitsü nungnanga alirtem asoshi nübur lenirtem den lungjemer inyak," ta Santosh Gupta, Chief Executive Officer, Indian Social Responsibility Network ajanga ashi.

Mashisa aser nubentsür tem densema tetsürtem aser teintet rogotem nem vaccine agütsütsü asoshi yimtsüngtem nung vaccination center amenoka liasü, anungji parnok vaccine agitsü asoshi meta talangi meyok. Ajidang masü project nungi teshimtet nüburtemi phone ajanga jembia vaccine agitsü anogotem lephsia liasü, ta ashi.

Nübur timba nem vaccine agütsütsü, vaccine dak tamang katettsü asoshi state sorkari meranga inyakba atema Project ajanga tentüngsang agüja liasü.

Ajak lungjemer inyakba ajanga state nung nüburtemi COVID-19 vaccination indang tali tejangjaba metet.

Mokokchung nung Anti Malaria Month mungogo

Dimapur, Aami/June 26 (TYO): National Vector Borne Disease Control Programme (NVBDCP) Mokokchung ajanga yimtsüngtem, talisa Assam den arütsüa aliba Mangkolemba, Tsurangkong aser Tuli Block ama nung meta talang, malaria alitsüla aser awareness ajema alidak "Time to deliver Zero Malaria: Invest, Innovate, Impliment" omen nung ajemdaker Anti Malaria Month munga liasü.

Iba mapang malaria (ramen) tashidak tendangba, yimdaklir den Malaria awareness senden amenba, tetsü oshi nung Malaria Pamphlets yanglur lemtsüba, Miking, LLINs timi amshiba amala angazükdakja sentong balala ayongzüka liasü.

Yimdaklir dang ASHAs, Surveillance workers, Health

Centres nungi angati ramen tendangtsü ajungshia liasü. Malaria screening mapang shinga daka ramen meputet.

Dr.Lhishelo Tsuhah, DVBO Mokokchung; Dr.Toshimongla, Epidemiologist aser Imkummongba DVBD Consultant nung temi Tuli, Mangkolemba, Changtongya aser Tsurangkong nung Health Centres balala semdanga jaja aser health staff aser ASHAs tem dang temang aronger aser metar ajak dak ramen tendangtsü aser documentation atema osang tejangja bendentsü ajungshia liasü.

Taoba küm Malaria records nung ajemdaker Mangkolemba Block, Tuli Block aser Changtongya Block nungi Sample Villages tem shimteta liasü.

Abu Metha-i NBHM ketdangsür den sensaksem aka

Dimapur, Aami/June 26 (TYO): Advisor to Chief Minister & Chairman IDAN, Abu Metha ajanga Nagaland Beekeeping and Honey Mission den sensaksemba senden ka Multi Utility Center NBHM nung June 26, 2023 nü mena liasü.

Nagaland nung rongsenketzüng tsütsü ninang mojitzü nung teimla tulu aliba indang jembidang, Metha-i NBHM ketdangsür dang Nagaland Honey atema lungjemer inyaktsü ajungshi aser Nagaland Honey ya otsü tajung ka südaktsütsüla, ta ashi.

Product ayoktsü atema takotet nisung nungdaker aser marketing atema social media sapang kanga tongtipang lir, ta pai ashi.

Honey Mission ajanga

ninang (longlang) metsür aser yimdaklir ajangzüktsü asoshi nükjidong ayutsüla, ta Abu Metha-i ashi.

Honey Mission ajanga tanü tashinung mapa tajung balala inyakba atema pai tenüngsang agütsü aser Nagaland rongsenketzüng ajungkettsü asoshi ano tajungba inyaktsü pai ajungshia liasü.

Iba mission ya 'promotion development' atema kisung masü saka marketing aser multitasking atema inyaktsüla, aji asünung dang Nagaland honey ya danga leni yoktetsü aser danga lima nunga yoktetsü, ta pai nenshia ashi.

Pai Mission ketdangsür dang lungjemer Nagaland indang ninang mojitzü ya danga linük temia yoktetsüsa inyaktsü ajungshia liasü.

Dimapur nung International Day Against Drug Abuse and Illicit Trafficking among



Dimapur nung June 26, 2023 nü International Day Against Drug Abuse and Illicit Trafficking anogomung amungdang tangokba noksa ka yangi angur.

Dimapur, Aami/June 26 (TYO): Dimapur nung June 26, 2023 nü International Day Against Drug Abuse and Illicit Trafficking anogomung munga liasü.

Iba nüngtem nung Deputy Commissioner & NCORD Chairperson, Sachin Jaiswal, IAS lenisüba kübok District Level Narcotics Coordination Committee Dimapur ajanga DC Court Junction nungi City Tower tashi Rally cum Marathon sentong ka ayongzüka liasü.

Iba sentong nung o tatsüka jembidang Deputy

Commissioner, Dimapur ajanga ashiba agi, ibai tongtipang anogomung ka lir aser United Nations tawapangba kübok küm shia amunger aser Dimapur aser Nagaland asoshia kanga tongtipang lir, kechiaser temesepba mozü achi ajemba osangtem arütsülen nungi arur.

"Talisa lanurtemi iba temesepba mozü indang kanga junga meteta alitsü nungdaker aser iba atema asenoki iba anogomung munga temesepba mozü ajanga temang nung timtem balala ajuruba indang osang prokshir," ta pai ashi.

Temesepba mozü amshir nem teyari balala agütsütsüla, kechiaser parnok ya maksü ama züngshir aser lokti tentet balalai parnoka anisemer maparen balala nungloksütsüla, ta ashi.

Iba sentong nung ADC, EAC, DCP, ADCP, Social Welfare officials, 42 Assam Rifles Jawans, the Police Department, Produgal Home (Rehap), NGOs aser Cornerstone, Dimapur Higher Secondary School, St. Mary's, Ram Janaki amala school aser college tem nungi nisung 150 dak tema arua shilem agia liasü.

K-15015/152022-SP-V I/5586/2023

ANNEXURE-I

GOVERNMENT OF INDIA
MINISTRY OF YOUTH AFFAIRS AND SPORTS
DEPARTMENT OF SPORTS
HUMAN RESOURCE DEVELOPMENT IN SPORTS (HRDS) KÜBOK
APPLICATIONS MESHIR

Ministry of Youth Affairs and Sports (MYAS), Government of India kübok Department of Sports ajanga Scheme of Human Resource Development in Sports kübok Fellowship Programmes, Exchange of knowledge / Research / Ideas, Assistance to Match Officials, Coaches and Supporting Personnel, Assistance for Research and Publication of Outstanding Works on Sports dak sendakba subject tem nung applications meshir.

2. Iba Scheme nung telemsa yamai alitsü:

- (i) Saisapong den apet sports science disciplines nung India aser bendang lima nung advanced/specialized training of short term (ita 3 nungi 6 tashi) aser long-term (küm 2 tashi) modules/ workshops/ course/ programmes asoshi Fellowship Programmes atema;
- (ii) Exchange of Knowledge / Research / Ideas:-
 - a) India aser bendang lima nung seminars/workshops/conferences nung adentsü atema;
 - b) Linük telungzük nung Training Programmes, Seminars, Workshops/ Clinics aser Conferences ayongzüktsü atema.
- (iii) Tapet disciplines/ areas nung specialized training agitsü atema aser international bodies mesüra National Sports Federations (application agütsüba anogo tashinung Department of Sports ajanga recognized sua aliba)/ IOA ajanga ayongzükba qualifying examinations nung shilem agitsü Match Officials, Coaches aser Support Personnel atema teyari asoshi;
- (iv) Sports dak sendakba disciplines nung Research projects atema teyari atema;
- (v) Saisapong asoshi tongtipang Works/Journals/e-Journals/web-based applications (apps) Publications/e-Publications of Outstanding atema.

3. Jangra aliba kija/tentet ajanga parnok application ya Designated Committee indang senden mamendang aser Designated Committee senden amentsüba ita atongtsü anogo 20 majung tsungta agütsütsüla.

Iba dak sendakba nung tali tejangjaba metettsü atema Ministry indang website link <https://yas.nic.in/sports/scheme-human-resources-development-sports-0> nung angutsü.

Sd/-
Vimal Anand Director (Sports)
vimal.anand@nic.in

CBC 47108/11/0001/2324



June 25, 2023 nü Egypt yimtiba, Cairo nung Ato kilonser Narendra Modi aser Eqypt Tir Abdel Fattah El-Sisi na senden amendang tangokba noksa nung angur.

India aser US tsüngda tesendak-tepji alima atema tajung: PM Modi

New Delhi, June 26 (Agencies): Hombarnü Ato kilonser, Narendra Modi-i, India aser US na tsüngda tesendaktepji alima atema tajung; ibaji ajanga alima tajungba akümtsü, ta ashi.

Tawa Ato kilonser, Modi-i US semdangba mapang nung lenla balala nung technology partnership tajungba akümtsü atema tezüngzüktep aika agiogo.

Amongnü US Tir Joe Biden-ia twitter ajanga, "United States aser India na tsüngda tesendaktepji alima nung kanga tongtibang tesendaktep rongnung ka. Iba ya tashi taitba, anasatiba aser terenlokba akümer," ta metetdakja liasü.

Joe Biden-i anogo asemnü Modi agizükba mapang nung White House kima moapu nung nisung 7000 dak temai Modi agizük, pa nungtem nung chiyung sentong ayongzük aser technology company balala nungi tekolakpurtem, entrepreneurs, ketdangsertem

aser CEOs den senden mena liasü.

Biden-i twitter ajanga metetdaksüba lemsatempa Modi-i twitter ajanga, "Ni nü den ai-aura akar, @POTUS @JoeBiden! Asen linük ana tsüngda tesendaktepji alima atema tajung, ibaji ajanga asen lima tajungba akümtsü," ta metetdaksü.

Modi-i US semdangba mapang nung pai General Electric chairman, H Lawrence Culp den senden amenba sülen Indian Air Force atema raraba tayimtsü gol India nung yanglutsü atema General Electric aser Hindustan Aeronautics Limited (HAL) na tsüngda tezüngzüktep ka agi.

Iba sülen GE Aerospace-i twitter ajanga sangdong ka nung, Indian Air Force atema raraba tayimtsü gol yanglutsü asoshi parnoki Hindustan Aeronautics Limited (HAL) den Memorandum of Understanding (MOU) ka sign süogo, ta metetdakja liasü.

Opposition senden nung PM menden atema mejembi: Sharad Pawar

Pune, June 26 (Agencies): Hombarnü NCP Tir, Sharad Pawar-i, Patna nung ayongzükba opposition party tem senden nung Ato kilonser menden atema kecha mejembi, ta metetdaksü.

Sangküm Lok Sabha election nung BJP anema tokteptsü atema opposition party 17 longjemogo, aser iba dak sendakba nung Hombarnü Pune kübok Baramati jila nung osangbenertem den jembidang Pawar-i, iba senden nungji osettsüset nung jenjang atuba, mapa manguba tebilemstü aser linük tesem kar nung telemsa adokdaksüba teloktem pusemba tebilemstü onüktem jembigo, ta metetdaksü.

Opposition party tem

senden amenba sülen BJP-i aitsüba dak sendakba nung pai, "Iba senden atema BJP-i kechiba shisabulur?, ta asüngdang.

Bihar chief minister aser JD(U) Tir, Nitish Kumar-i ayongzükba senden nungji opposition party balala nungi lenir 32 aden aser parnoki sangküm Lok Sabha elections nung BJP anema longjemer tokteptsü bangjemogo.

BJP-i, iba senden nungji Ato kilonser kümner lenir 19 liasü, ta aitsüba dak sendakba nung Pawar-i, ibaji tanur asayamenu o ang mesük, ta ashi.

"Senden nungji Ato kilonser atema o melemtep. Osettsüset jenjang atuba aser mapa manguba tebilemstü atema dang o lemtepa liasü," ta pai

metetdaksü.

Tamangba yimsü aser kin nung ajemdaker telemsa adokdaksübaji loktiliba ajak atema majung, anungji item amaji koma azüoktsüla, ta onoki o lemtepa liasü, ta paisa metetdaksü.

"Kechiba democracy linük nung (opposition lenirtem) senden amentsü atema temelaba magütsür? BJP state (Maharashtra) Tir, ni pa tenüng mebileteter, pai kechiba iba senden amen, ta asüngdang. Pai Mumbai nung senden ka ayongzüksü ta jembiba ni züngshiogo. Nenoki (BJP) senden ka ayongzükter, anungji onoki senden ayongzüka agiba ajanga kechiba nenok shisabulur," ta Pawar-i asüngdang.

July ita nung Data Protection Bill Parliament nung benoktsü: AG

New Delhi, June 26 (Agencies): Centre sorkari Supreme Court dang, Digital Personal Data Protection Bill atema aika den o lemtepa aruba sülen iba bill renema dang lir aser taküm July ita nung tzüngluruwa mongpu Parliament nung iba bill benoktsü, ta metetdaksü.

Attorney General (AG), R Venkataramani-i judge pongui akümba bench dang, digital lima nung nija osangtem kümzüksü atema mera agia

inyaktsü asoshi temepishiba ken otem agüja alibaji angadangtsü atema anogo atsülangang, ta mepishi.

Ajisüaka Senior advocate, Shyam Divan-i, iba onük nung legislative inyakyim aser judicial naji bendangtsüla, kechiyong iba bill ya kodang ozüng akümtsüar shingai memetet, ta ashi.

Ibaji langzüa Venkataramani-i, December ita nung ministry of electronics & information technology-i Draft

Bill renemogo aser public dang nungi tebilemba asüngdanga ministry indang website nung metetdakja liasü, ta ashi.

Judge ana- Justices Joseph aser Rastogi na taküm June ita nung mapa nungi anisüngzükter, anungji iba ken o angadangtsü atema mapang kangabo mali aser May 22 nungi tenzuka Supreme Court ita ka ser tesadang meiwa sodi mapang lir. Anungji bench-i iba ken o ya August ita nung ang angadangtsü.

Himachal Pradesh nung tzüme-tsüng lendong nung nisung trok asü

metetdakja liasü.

Shimla, June 26 (Agencies): Himachal Pradesh state tem aika nung tzünglua sashia arua anentsüh aser tzümetsüng lendong balala nung nisung trok asü aser nisung ter dak tema yiruogo, ta ketdangsertemi metetdaksü.

Hombarnü State Disaster Management Principal Secretary, Onkar Chand Sharma-i, "Tang tashi nung nisung trok süogo aser nisung 10 yiruogo. Kiset shiruru-a 303 süogo," ta metetdaksü.

"Tzünglu sashia aruba ajanga sen crore 3 shi jenjang takoksa nguogo. National Highways ana densema gari lenmang 124 raksaogo," ta paisa metetdaksü.

Anentsüh alua gari lenmang mokdangba ajanga Mandi kübok Chandigarh-Manali highway nung gari aika anendena liasü.

Amongnü nungi tenzuka tzünglu maneni aruba ajanga Mandi police-i Mandi-Kullu National Highway (NH) nokdang aser iba lenmang melena jajaba Mandi-Joginder Nagar Highway-a police-i nokdanga liasü.

"Onoki ghonda asem tsüngda lenmang lapoktsütsü atema meranga inyakdar," ta Mandi nung SHO, Sakini Kapoor-i

Amongnüa Mandi district kübok Bagipul area nunga gari lenmang mokdangba ajanga lisopurtem aser raliwalirtem 200 dak tema mesenzüteti liasü.

Mandi District Police DSP, Sanjeev Sood-i, region nung lendong nungi kümzüksü atema nisungtem aika aienshidaktsüdar, ta metetdaksü.

Onkar Chand Sharma-i, June 21 nü ketdangsertemi tim department balala aser duty commissioners den senden ka mena tzüngluruwa mongpu mapang lendong nungi nüburtem kümzüksü atema o lemtepa liasü, ta metetdaksü.

Iba senden nungji National Disaster Response Force, State Disaster Response Force, Central Water Commission (CWC), Civil Defence aser India Meteorological Department (IMD) nungi tongti ketdangsertema shilem agia aden.

Onkar Chand Sharma-i, "Tesüiba anogo asemnü tashi state nung mongpu tzünglu aruba manener. State tesem balala nung tzünglu sashia aruba, tzümetsüng aser anentsüh aluba osang aika onok nem metetdaksüogo," ta ashi.



June 26, 2023 nü International Day against Drug Abuse & Illicit Trafficking anogomong nung Bengaluru nung Karnataka Deputy Chief Minister, DK Shivakumar aser Karnataka Sports Minister, B Nagendra na den kaketshirtemi tenangzükba agidang tangokba noksa nung angur.



TIR YIMYIM YIMOBILEM (EDITORIAL)

DIMAPUR SANGTENNÜ, AAMI (JUNE) 27, 2023

Shiki nung memelenshi !

Alima ajunga nung küm shia June 26 nü United Nations (UN)-i ayongzüka "International Day Against Drug Abuse & Illicit Trafficking" anogomung amunger. Tetezü alima ajunga nung ozüngi memelaba mozümora achiba aser ayokba anema amungba anogoji June 26 lir. Anungji iba anogo ya alima ajak nung yimten aser lokti tentet balalai machimajemtsü mozü achiba aser ajemba anema jemba amunger. Aji oda, alimasa asüyonga, iba anogomung ya yashi Nagaland nungsa tapetba mungogo ta bilemer, kechiyong asen lima nung mozümora achir asen chirnurtem aika kümogo. Taküm iba anogomung asoshi United Nations On Drug And Crime (UNODC)-i shimtetba omenji " Nisungang Tama, Tesempa aser Tesendok, Nokdangba nung Tashi Itshiang," ta agüja liasü. Iba omen nung aketba onüktem ya kodang asenoki jungjunga bilemdangdir, atangji, asenoki mozümora achirtem yabo nisung masü amai bilemer, kechiyong parnoki tashi manger, ochimashir aser mapa shitak meinyaker. Aji oda, parnokji kidang kibong nung ajak asoshi tamzüksü aser meinprongtsü shiruru amai ka dang kümadoker. Parnok aliba agi kibong mainer, kidang kecha ayu majung samadoker, anungji parnokji konganga mayu ajak asoshi temeintsüka akümer. Iba ama timtem aser tesama ajuruba agi, tamalena asen lima nung yimtsüng ajak nung amato mozümora achir aser ayokertem pua merenshitsu atema shiki yanglua yur, yangjisa puoka yutsü. Atangji, aji yimteni tesempa agi masü saka tajung küma melenshidaktsünüba agi merenshiba inyakyim ka liasü. Ajisüaka, iba shiki nung melenshiba purtem aikabo mangur saka shiki yanglua ayuba agi mozü achir aser ayokertemang tali aküm ama, tanübo ozüngi memelaba mozü tapu balala agi lanurtem taküm meteta aser memeteti aika raksadagi. Ibaji asenok ajak tamakok asütsü. Iba tamakokji reprangteta asenok dang ashir ama asenoksasa asenok dak angaloktsüsa taküm UN-i iba mozümora anema amungba anogomung omen shimtetogo. Atangji, mozü achirtemi timtem agütsübaji tachir aser kinungertemi dang metet, tezudangtsüka aser tejashitsüka jepaka nüktzü malu. Ajisüaka, shiki ama nung yua merenshiba agi mesüra pei chir aser kinunger masü küma sendokba agi ajungla masü, parnokji shiranger, anungji parbok dang meima mozü kidang anepalutsüla. Atangji, parnok anepalutsüba mozü kiji nisungtem shiranga amungdak hospital masü, saka parnokji asenok kinunger, medemer aser arogo nunger rongnung züngsem tajung ka ama asenok mulungjangi pa mesüra laji agizüka asenoki anepaludakjiang parnok asoshibo mozü ki asütsü. Mozümora achir aser ayoker melenshidaktsütsü aser nokdangtsü atema yimteni shiki yanglua merenshiba mapatemjia maitsür, kechiyong merenshitsuübaji yimten mapa dak keta lir. Ajisüaka, shiki nungi parnok melenshir aludang to parnok ki matong tsüngda asenok arogoi ajepzüka anepalu asübo koda jungla ta bilemer. Atangji, arogo aikati mozümora achirtem taküm melenshidaktsütsü asoshi " Rehabilitation Center" tashi lapoka anepaluba angur aser yangjia nisung aika taküm melenshiba asenoki angashir. Ajisüaka, ano arogo aikati mozümora agi lanurtem taküm samaba indang süoki ia mebilemer. Iba jagi oda odabo lanurtem taküm ajak raksadoker arogo nung tenzüker asütsü tetemsü nisung mangu kangshitepba angur. Mozümora achiba anendaktsütsüba yabo hopta ka ana tesem ka nung shibanga yur Tsüngrem o shia amungba kisung agi majungtsü. Ajisüaka, parnok anepaludakji küm kabosa lia mapa angazükdak training center ama mesemteta mapa angazükdaktsüba den mozü agi anepalutsü aser Tsüngrem o agi parnok nem teimla agüja anepalura, atangji, yangji parnok nisung tasen kümadoktsü. Idakji government o arogo na külem ser inyaktsüba wadang ka reprangtetter.

OLEMSABANG KIBONG NUNG NÜNGDAKBA JENJANGTEM

~ Mrs. Amenla Amlari, Source: Otongdar

(Yashi adok nungi...)

4. Tesendaktep Jenjang: Kibong ka lungjema aser tesünep nung alitsü asoshi tesendaktep jenjangji kanga nungdak. Saka Alima Onsara kara renloka aoba ajanga meimchirtem asoshi alimai sempet jenti bushitetsüogo, tatishitsü agi Television, computer, mobile phones etc. Item amshiba nung mapang indokdang kibong nung apuani aser chirnur tsüngda mapang magütsüteter. Ano kibong aika nung apuani aser chirnurtem ajak job balala nung tenzüker. Iba den ano wara ajanga ano tanurtem ajak online ajangang education angazükteperji, joko pei pei wadang akoktsü merangdang anogo tepiyong kati ka tejak mongutepe aser kati ka den mejembitepi anogo aser mapang süidakja tesendaktep jenjang samaa odaki. Kibong nung kati ka ajungshiteptsü, shisa lemsateptsü, kati ka azüokteptsü, aser shisabulu khuret lemsateptsü asoshi tesendaktep tajung akatsüji kanga tongtibang aser iba tesendaktepji kibong nung mapang peria agütsütsüla. Ajioda mesüra kibong ajanga alima asoshi khuret aser tebilemstsü dang bener arutsütsü. Aser kibongji temenungratsü tesem ka masü saka tezudang aluba tesem ka kümadoka kibong teronem jenjangketji samatsü.

5. Kibong tekülem Jenjang: Khristan kibong yangertsü asoshi ano tongtibang kaji Kibong tekülem jenjang ya lir. Jonathan Edward-i ashibaji "Khristan kibong shiaji arogo tila ka ama asütsüla". Shin O-i ashir "Koba kibongi külemi sarasademer iba kibongji teti lungjema alir". Kibong tekülemji kibong nung alirtem asoshi Tamang tamendakdak asütsüla. Oral Robert-i Yisuji par kibong nung züngsem ka ama bilema intet ta kuli asü. Asen kibong nung alirtemia aji oda Yisuji asen kibong nung züngsem ka ama bilema intetra, ni amanger asen kibong tamangi alima ajettsü. Kodang ner kibong rongnentsüji kibong tekülem südaktsüdir, alimai komarka meranga anokshitsüyonga anokzüka meyoktetsü aser asen kibong jagi yipru ajak tizüka nokdaktetsü.

6. Mapa meranga inyakba Jenjang: II Tesalonika 3:10b "Nisung kari mapa inyaktü memulungra, pa techiyungdaktsü." Tsüngrem O nunga mapa meranga inyak nungang chiyungdaktsütsü shia lir. Saka tanü meimchirtemi mapa meinyaki aser asentsü meseni dang chiyunga jema jenjang tajung nung linür. Asen Sobaliba tajung jagia mapa meranga inyaka taküm alitsü sayu sümung, tanü iba meraket jenjang sendoker azümesen sobutsü sobur nüngsang konang ka ama liteper. Shirnoki mapa meranga inyaker parnokjiang atalatsüba putuji tanü putu ya kümoko. Yamai dang lia ora asen kin sensak tia-i aitsü aser kibong rangben telungi aitsü. Tarutsü putu ya AYATAI asütsü. Anungji mapa meranga inyaka taküm alitsüba jenjang nung asentenshi ka kanga nungdaka kümogo.

7. Wainshin aser tazüokba Jenjang: Wainshin tajung jenti kibongtem nungi samaa aoba ajanga kibong tobur mejungdaktsür aser teronem tanang madoker. Tanü lanu putui waishin tajungtemji putu den mapet amai bilemer aser kibong nung itemji sayubentsütsü menüngdak ta bilemer. Lba jagi tanü meimchirtem shiruru ama tazüokba mali aser taküm libaliro ajak nung jenjang meketi dang liteper. Tatishitsü agi Teintet aser tsürabur akhümtsüba mali, salepsari aser makmanü O jembitsü marendaker, jayajako memetet, yimya awashi memetetba ano aika lir. Joko meimchir asoshi maksü kecha maka pei dang jungra /ajanzüklibo ojang ta asüba tangatetba nung liteper. Anungji alima mera keta jenjang ajungkettsü asoshi kibong nung kanga dang tongtibang süa nungdakba jenjangji Wainshin aser tazüokba jenjang ya lir ta angatetdi.

8. Temeim Jenjang: I Korint 13 jagi Temeim jenjang indang teratet jangratemtsüka agüja lir. Saka tanü kibong aika balaluyuba, raratepba, Ochi mashiba, Temulung melemtetba aser kibong nung aiener ama O mejembitepi aliba asenoki angur. Ya tanga kecha agia masüa saka Temeim jenjang ajema aser mokonga akümba aser Temeim jenjang junga mangateti kibong amentetba ajanga lir. Kodang temeimji Tsüngrem meimba Tashi nungi arudir aser temeim koba Tsüngrem nungi agizük ibaji angatetdir, asenoki kibongji meimtsü aser Tajungtiba kibong südaktsütsü merangtsü aser Tsüngremer lenmang nung azüoka anitsü. Mathi 15:21-28 nung Kanantsürlai lar tanur meimyong Azü jenjang tashi küma teküboktiba jenjangi lua Yisu dang meshimetsüba ama, Tsüngrem nungi aruba temeim jagibo pei kibong mesamai kümzüka ayutsü asoshi bendanga agütsür. Temeim jenjang tashi ya onsara jangratemtsüako, arungma iba jenjang ya wazüka yudi aser iba jenjang yagi kotak matong tashi kibongji alenbanger aser meyibanger jjadi.

OTEM:

Hauni, kibong nung nungdakba jenjangtemji aikasa lirko, karbo tongtibang aser karbo tongtibang masü ta ashir masü, ajakji saku tongtibang lir. Kibong ka tashi-ita aser kotak mesüka yangertsü asoshi mapa temela masü. Saka kodang Ocet nung lemsatepa aliba jenjangtemya danga kibongtemi nendaka aser Tsüngrem tashi nung inyakdir, amanger asen kibong jagi Tsüngrem nükjidong atalokdaktsütsü aser alima asoshi süngjang tajung agütsütetba kibong ka ka sütetsü. Taküm ka tashi-ita nokdaksü asoshi kibong jagi tera yangtsür-a ta asürji asenoki alima jeta nokdaktetsüsa kibong teraji tashi-ita yangerti arung. Koba jenjangsa asen kibongi nungdaka lir shisadangti aser tashi maitbatem kar lira akangshia yangerlokto, junga aser abensaa lira Tsüngrem tenüng sangti. Iba ocet azüngba ajanga kibongtem nung asentenshijangma. Amen.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

German court kati abortion clinic anasa sarasademba tenokdangba agien



40 Days for Life German chapter nung tongti lenir, Pavica Vojnovi?-i abortion clinic ka anasa sarasademba noksa nung angur.

June 26, 2023: Germany nung court kati, tanur raksaa indokba clinics anasa nisung adenshir tesünep nung sarasademba nokdangba ya linük temzüng kübok nisung adenshitsü temeden anema inyakba lir, ta obendang agütsü.

Tan hopta Leipzig nung Federal Administrative Court-i abortion clinics anasa sarasademba tenokdangba agientsü atema obendang agütsüba ajanga Pforzheim nung amenoka aliba Khristan melungtet telok- 40 Days for Life German chapter-i legal tsütsü takok angur.

40 Days for Life German chapter nung tongtiji Pavica Vojnovi? lir.

Meimchir temeden atema inyakba organization ADF International-ia iba ken o nung la (Pavica Vojnovi?) pusema liasü.

European advocacy for ADF International nung Director, Dr. Felix Böllmann-i, "Tesünep nung sarasadembaji nokdangtsü makok, ta Leipzig nung aliba court-ia maneni jangjashitsüogo," ta metetdaksü.

"Court tetuyuba nung ajemdaker federal sorkar dang abortion clinics anasa sarasademba nokdangtsü aliba asalentongji agientsü metetdaksür," ta pai ashi.

Yaküm August ita nunga regional court kati, 40 Days for Life German organization-i tesünep nung adenshir sarasademtsü akok, ta obendang agüja liasü, saka tesülen Pforzheim yimti nung ketdangsertemi iba obendangji anema ken o benoka liasü.

Federal Minister for Family Affairs, Lisa Paus-i Germany linük tesem ajaklen abortion clinics anasa sarasademba nokdangtsü atema sentong yanglua inyaker.

Paus-isa German criminal code nung Arrla 218 agientsü mepishir.

Pavica Vojnovi?-i, "Atangji ni anisüngzük nguogo. Onok

sarasadem langzüogo, kechiyong takoksa angur tetsürtemi onok dang aiben mepishia liasü. Onoki maneni (abortion clinics anasa) sarasadem agitetsü, ta meteta ni kanga pelar. Meimchir ajak takümü senti aser tekümüzkba nüngdaker," ta lemsatep.

Akhidang nungi 40 Days for Life teloki küm shia anaben Pro Familia facility (abortion clinic) anasa adenshir sarasadema sentong agia arur. Iba facility ya Germany nung Planned Parenthood indang branch ka lir.

Pforzheim yimti nung four-lane lenmang yangluba ajanga 40 Days for Life indang building aser Pro Familia building na bendanga lir, ajisüaka 2019 küm yimti ketdangsertemi Pro Familia anasa Khristantem sarasadembaji nokdanga liasü.

Iba sülen Vojnovi?-i ketdangsertem tenokdangba anema court dang, iba tenokdangba ajanga nisung

adsenia sarasademba temeden agiener, ta shia ken o benoka liasü.

"Onoki tetsürtem aser no menden nung aliba tanurtem atema sarasademtsür, ajisüaka ibaji nokdangba ajanga ni süngmanger. Lokti aliba tesemtem nung ola madoki sarasademba-a ketdangsertemi nokdangba ajanga onok mepelar," ta lai metetdaksa liasü.

Vojnovi? atema ken o jembitsür, lawyer Tomislav Cunovic-i sangdong ka ajanga, "Nisung adenshir sarasademba nokdangbaji meimchir temeden balala anema lir," ta ashi.

ADF International nung Director, Dr. Felix Böllmann-i, "Tang tesüsa court-i agütsüba obendangji ajanga Berlin (Germany) dang, timtem nung aliba tetsürtem atema ola madoki sarasademtsüba nokdangbaji democratic linük nung mapet, ta kuli sayur," ta metetdaksü.

South Korea nung Khristantemi yimjung atema sarasademer

June 26, 2023: Korean War tembangba sülen küm 70 ajungba nüngtem nung South Korea nung Khristantemi Korean Peninsula nung yimjung alitsü atema sarasademer; ita ka piyong parnoki sarasadem sentong balala ayongzüka agitsü.

Korean War tenzüka anogomong June 25 nü Arogo ajak nung Khristantemi sarasadem.

"Nü melungjang nung Khrista tesünep ajanga yimsü südakjang" omen nung ajemdaker sarasadem sentong agi, aser maneni ita ka piyong parnoki sarasadem sentongtem agitsü.

North Korea den arrtsülen aliba Uijeongbu Arogo nunga Khristantem tekülem sentong nung aden. Iba sentong ya National Reconciliation Committee nung tongti, Bishop Simon Kim Joo-young leniba nung agia liasü.

Kim-i, "South Korea aser

North Korea tsüngda tesendaktep mejungi aliba mapang ka nung asenoki yimjung atema inyaktetsü kaji-Tsüngrem tashi nung tamang akatsüla aser sarasadem tashi nung tamang akatsü akok," ta ashi.

Paisa tawa June 6 nü putirtemi North Korea den arrtsü anasa aliba Joint Security Area (JSA) Church Panmunjeom-i temeshi aini aoba lemsatep. "Iba lima nung yimjung mali tashi tamangertem ajaki sarasademtsü ni imlar," ta pai ashi.

Uijeongbu Arogo kübok National Reconciliation Committee nung tongti, Peter Kang Joo-seok-i, tesüiba küm ishika tsüngda Korea ana tsüngda tesendaktep kanga mejungi kümogo, anungji yimjung atema sarasademtsüji kanga tongtibang kümogo, ta ashi.

North Korea nungeri missile yoktsü, anungji May 31, 2023 nü

ANOGO ABEN TSÜNGREM DEN

Bendang lima nung ken atenba T. Ken 149: 1-9

"Nenoki Kibuba sangang! Kibuba dang ken tasen ka tenang" (t.1). Kasa kenji tenla kidang dang atentsüla ta asenok tangatetba ka lir, aser idakji kecha tai mali. Ken züluri ken kakat tasen alitsü asenok dang mashir. Pai asenok dang Kibuba metetba tasen akatsü asenok dang ashir. Idangji asenoki Kibuba tenüng asangba ken tasen Kibuba dang tentettsü.

Lenten tasen ajangba shia, tenem tamajung ajangba shia, taküm nung tajangshiba shiai asenok mulungjang ken tasen zülutsütsüla. Idangji asenoki ken tasen agi Kibuba tenüng sangtetsü. Kodang asenoki timtem ka ajurudir, asenok tamang tasen inyakba angutsü aser ken tasen agi Kibuba tenüng asangtsü mapang tajung angur.

Tekong ka nung asenoki telok nung ken atentsü ken züluri ashir. Telok nung Kibuba tenüng asangba ken atendang asenok pelar. "Israeli Pa yangluba dak pelaseta lidakjang: Zion chirtem parnok chuba dak pela liang" (t.2). Kodang Tsüngrem chirtem Tsüngrem mapa asoshi tenüng sanga senteper, iba nung ajak pelateper. Pai ajungba asoshi Pa nem tenüngsang agüja ajak pelateper.

Saka ano Pai ashir, asenoki yipden nunga pelateptsüla. "Parnoki tepela agi parnok yipden manunga ken tendakjang" (t.5). Kodang asenok anisüngzükalidir, shiranga aliba nungi taneptsü angudang ya inyaktsü akok. Tang na yipden nung aser na anema mali. Ne yipden nung Kibuba sangang aser Pa külemang. Ken züluri ashir, "Parnok bang nung Tsüngrem nüngsang tulu lidakjang, aser anatsü nok parnok ket nung kintem madak mang ayangtsü aser nisungtem madak temerenshi inyakdaksütsü" (t.6,7). Ibai rarai aor noksa ka lir. Tongpang rara nung ken atentsü.

Telok nung ken atentsü temela saka yipden nung aser tongpang rara nung temela masü. Saka asenoki tenra asenoki Kibuba sentsüwangshir, asenok aintsü. "Kibuba ajemalur takok agi tebur jungdaksür" (t.4). Asenoki Kibuba dang tenra asenok tepelaba aser temeshiba aser tali topur tajungba asütsü.

Nai Pa temeim aser taochi tejangjaba angazükdaksütsü asoshi tajangshiba balala ajanga Tsüngremi na anir. Tanü nai kechi timtem ajurudir, ibaji odang taremzük mesüra amajok tekümdaksü. Ibai Tsüngrem tenüng asangtsü ken tasen ka anguba sudakjang.

South Korea yimtiba, Seoul nungi nisungtem aienshiang ta tekümdangtsü osang ka metetdaksa liasü. Iba osangji tiyazü liasü saka nisung aika kanga aoksatepogo, ta paisa metetdaksü.

Tayongzüka jenti liaka asenoki Korean Peninsula nung yimjung alitsü atema maneni inyaktsü nüngdak, ta paisa metetdaksü.

1950 nungi 1953 küm tashi raraba ajanga Korean Peninsula kanga takoksa angu aser telemsa adok. Iba mapang nungji North Korean communist sepaitem dang nungi jenbutsü atema Khristantem ajak South Korea-i jena ao.

Catholic Bishops' Conference of Korea (CBCK)-i North Korean Arogo ya "Silent Church" ta sangdonga "Day of Prayer for the Silent Church" tenzüka liasü saka 1992 küm iba nungja agi "Day of Prayer for National Reconciliation and Unity" ta melena liasü.

1984 küm CBCK-i yimjung ajungkettsütsü atema telongjem adokdaksütsü nükjidong nung North Korean Mission tenteta liasü aser 1999 küm iba nungja agi National Reconciliation Committee ta melena liasü.

Parnok leniba nung yimjung atema sarasademba den külemi awareness agütsür aser North Korea nungi ajenba refugees pusema yarir.

1392 nungi 1910 küm tashi United Korea ya Joseon tamarener kibongi yimsüsü liasü, iba sülen 1910 küm nungi 1945 küm tashi Korea ya Japan kübok liasü aser World War II tembangba sülen Korea ya ana küma lemsa.

Korea ana longjemdaksütsü atema inyakba mapang nung US aser Soviet Union na tsüngda mangatettep adokba ajanga Korean War tenzüka liasü.

Korean War nungji nisung million 4 shi asü aser nisung million 10 dak tema tesem balala nung jenshia liasü.

AO OSHI ANGAZÜKDAK: TANÜ ANGAZÜKTSÜBA OJANG



Ratet

(v) apitet, shisatet, tetezü shitet (realize, interpret)

* Narolai ki mapa ajak rateta inyaker aser pungmanga ratettsür.

Ratimati

(adv) tila nungi junga tulu akümba (grow well and great from small base)

* Moababo nisung tajung asüba agi ratimati kümogo.

OLONG PAITEP # 6558

Grid for crossword puzzle #6558 with numbers 1-15 indicating starting positions.

TIPILEN

- 2. Sü jeplok - (4)
4. O agi merenshi - (5)
7. Ayongküm li - (5)
8. Chiyungtsümapang süiadok - (4)
9. Tsüngrem den jembiba - (9)
12. Saklok - (4)
14. Samaba mebushitet - (5)
15. Mejanga onü - (5)
16. Tzü shiruru ka - (4)

LANGTSÜNGLEN

- 1. ____ i - (4)
3. Kasa masü - (6)
5. Nüchi masü - (5)
6. Tashi endok - (5)
9. Langtem - (5)
10. Anü malidang - (6)
11. ____ kibur - (5)
13. Tebur tembar tsüngda jatepba - (4)

OLONG PAITEP # 6557 TELANGZÜBA


TIPILEN :

- 1. Semtu, 3. Lepko, 5. Bilem, 8. Ulu, 10. Tsüngpang, 11. Tesangwa, 13. Aoksa, 15. Putir, 16. Yipru.

LANGTSÜNGLEN :

- 1. Sayu, 2. Teb, 4. Kimong, 6. Lungkak, 7. Milak, 9. Zünga, 10. Temopu, 12. Walu, 14. Ali.

Agüja aliba noksa nung meputepi aliba bushiang



Tanur asoba anogo nung salem osang den noksa angati adokdaksünura - Tenüing, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimim@gmail.com nung yokang mesüra Tir Yimyim bureau tem nung agüjang.

- 1. Tenüing :
2. Tasoba anogo:
3. Küm : 4. Class :
5. School :
6. Talidak :
7. Salem osang :

Tepela Tasoba Anogo



Manipur nung matamabensartemi yimjung atema lungkak ait



Imphal, June 26, 2023 (Agencies): Manipur nung tensa yimjung aser tesünep bener arutsü atema matamabensartemi Imphal West nung lungkak aitba sentong ka agiogo.

Parnoki Naoremthong Community Hall nung iba sentong agi aser "Do not kill civilians, we are disabled," "We want peace, Save our life", "Do not burn our house, Long live Manipur" tezülubatem bener lungkak ait.

"Iba lungkak aitba sentong ya

Manipur tensa atema ayonga agir aser onok dak-a kongshia lir. Onok tesem balala nungi adenshia shilem agir" ta lungkak aiter Ningombam Jayaprada-i ashi.

"Manipur tensa ajanga people with disability (PWD) 120 shi ka dak kongshia lir. Parnok indang ki kar rongdoktsü aser aika pei talidak tokttsür tangaleni ao" ta Social Welfare department-i ashi.

Iba tensa ajanga matamabensartem kanga timtemer aser relief camps nung

timtem jenti ajurur ta Jayaprada-i ashi.

"Ozü ki Saiton Santipur Maning Leikai nung liasü saka mitsü küma rongdoktsüogo aser tang Moirangkhnou nung relief camp ka nung jenoka lir. PWD spur relief camps nung alitsüba ya kanga tasak aser timtem aika ajurur" ta laisa ashi.

Laisa state sorkar dang tekaratiba nung yimjung bener arutsü atema mepishia metetdaksü.

Tipra Motha-i Permanent Residential Certificate amshitsü akhanger

Agartala, June 26, 2023 (Agencies): Tripura nung principal opposition party Tipra Motha-i Chief Minister Dr Manik Saha dang Tripura Public Service Commission (TPSC) examination nung 'Tripura Permanent Residential Certificate (TPRC)' compulsory kümdaktsütsü atema shidi ka züluogo.

"TPSC nung submission agienba ajanga tetoktepba tuluba akümer aser Pan Indian akümer. Saka TPRC magütsüba ajanga

Tripura nungi kaketshirtemi maongka mangur" ta MLA aser TIPRA Citizens Federation Convenor Tapas Dey-i ashi.

"Tripura nung kaketshirtei professional coaching institutes nung mezüngteter aser tanga competitive exams nunga tangar memener. Assam, Meghalaya aser tanünga state 8 nungbo parnok Public Service Commission Examination nung PRC compulsory kümdaktsüogo" ta Dey-isa metetdaksü.

"Kechiba Tripura-i tanga

northeast state tem sülen manidaker'ar memetet. Kaketshir dak ranglokba telok ka ama Tipra Motha-i iba atema ola madoki meyutsütsü aser PRC compulsory kümdaktsütsü ayongzükur" ta paisa ashi.

Iba inyakyim ajanga Tripura nung kaketshirtem ajanzüktsü" ta Dey-isa shisem.

Taoba Minister aser Congress MLA Sudip Roy Barman-ia kasa takhangba agütsüogo aser TPSC indang chairman nem memorandum ka agütsü.

Meghalaya nung nisung telok kati BSF outpost amak

Shillong, June 26, 2023 (Agencies): Meghalaya kübok East Khasi Hills district nung Deobar aonung yimdaklirtemi border outpost ka amakdang BSF sepai ana dena nisung 5 yiru. Mapang shia Border Security Force (BSF) sepaitemi timtemsa agütsüba osang angazükur aser yasüng yimdaklirtemi Dawki nung aliba Lad Umsiyem amak.

Yimdaklir kar Dawki-i aodang BSF sepaitemi timtem agütsü. Iba sülen ghonda ishika lir nisung telok ka adenshi. Idangji BSF sepaitemi injang khatok aser yimdaklirtem tetsübu nung jenshidang aika yiru. June 25, 2023 aonung Standing Patrol Base Old Umsiyem nung lemezüka aliba BSF sepaitemi International Border anasa Dawki-Pynursla lenmang nung nisung kar ozüing alema senzüba angu.

BSF sepaitemi iba tesem tonga aodang nisungtem jagi parnoki bena aliba khu tokttsür jena ao.

BSF sepaitemi khuji lapoka reprangdang Rs. 50,000 alang sarees bena liasü.

Kasa anogo nungsa BSF-i Rs 2,21,000 alangba süoshi shibelenzü merangba mapa ka apu.

Iba tatalokba sülen nisung telok ka BSF post-i aru aser BSF sepaitem dak lung aser beer bottles tazüing agi aon. Idangji Post commander-i parnok mesüzüktsü merang saka parnoki lung agi aonba manen aser idangji BSF sepai ana yiru.

Lendongi aitsü ta metetba agi NSF sepaitemi anüing nung injang khatok aser SHO PS Pynursla nem osang sangoktsü.

Osang angashiba sülen police telok ka tesem tonga oa tensa aziök. BSF-i injang khatokdang nisung yiruyibong kecha maliasü.

June 5, 2023 nü kasa tesem nungsa iba mesükba lendong atalok. Iba anogo Rs 1 lakh jenjang süoshi shibelenba apu aser idangjia nisungtemi lung agi

aodang BSF sepai ka yiru, ta PRO BSF Meghalaya-i metetdaksü.

Umsiem tesem nung ozüing alema shibelenba maparen kanga bulua inyaker. Nisung kari nashi, kari süoshi, kari cosmetics aser tanga ozüing noktanga aliba osettem Bangladesh-i shibelener ta PRO-isa ashi.

"Iba jagi BSF sepaitem jashi aser yimdaklir asem dang shibelenertem ta tai tonglokja merenshi. Iba osang ya yimdaklirtemi angashir aser parnok tesem tonga aru" ta paisa ashi.

BSF sepaitem yi agi meseper liasü ta yimdaklirtemi tai tongloktsür saka inspector general Pradip Kumar-i ibaji magizükur.

"Artsülen mapa lemezüka aliba sepai ajak yi majemtsü tetuyuba agüja lir. Iba tatalokba atema bushisüngdang ka tenzükogo" ta BSF Meghalaya Frontier inspector general Pradip Kumar-isa ashi.



Assam nung Directorate of Vigilance & Anti-Corruption ketdangsürtemi Morigaon Revenue Circle nung Lot Mandal Nabajyoti Nath apudang agiba noksa angur. Nath-i Namjari mapa inyaksütsü atema süpokrem Rs. 30,000 meshi saka ibaji jembia Rs. 25,000 tashi ajem. Iba nisung yagi Directorate tsüngdang ken o ka benok aser June 26, 2023 nü ketdangsürtemi Nabajyoti Nath aputsü atema tasa ka atonga inyakdang apu.

**GOVERNMENT OF NAGALAND
OFFICE OF THE DEPUTY COMMISSIONER**

PHEK: NAGALAND

ADVERTISEMENT

Dated Phek, the 22nd June, 2023

NO.DCP/ESTT/DLRB/2022(Vol-II)/470 :: Applications are hereby invited from eligible candidates for the following post under District Administration, Phek.

Item No. 1 : Multi Tasking Staff (MTS) (Level-1) Pay Matrix under 7thRoP)

| Sl. No. | District | Category of Post | No. of Vacancy |
|---------|----------|---------------------------|----------------|
| 1 | Phek | Multi Tasking Staff (MTS) | 1 |

Educational Qualification and Age :

1. Should be an indigenous inhabitant of the district.
2. Minimum age-18 years and Maximum age-35 years as on **21/07/2023**.
3. Application Forms can be collected from the Office of the Deputy Commissioner, Phek **w.e.f. 26/06/2023 to 21/07/2023** during Office Hours (**10:00 Hrs to 16:00 Hrs**) on payment of Rs. 200/- as form and examination fee.
4. Last date for submission of application form is **25/07/2023**. Admit Cards will be issued there after from the Office **w.e.f. 01/08/2023 to 04/08/2023**.
5. Incomplete documents and unsigned form shall be summarily rejected. List of rejected candidates if any will be put up in office Notice Board on **28/07/2023**.

**(KUMAR RAMNIKANT) IAS
Deputy Commissioner
Phek, Nagaland**

**Office of the
Chungtia Village Council
(Medemchanger Putu Menden)**

SANGDONGER

Chungtia Medemchanger Putu 30th June, 2023 anepdang 10: 00 ako nungi tenzüka meeting alitsü. Anungji unit ajak nungi ka danga absent mesüi arutsü Chungtia Medemchanger Putu Menden ajanga metetdaksür. Shiba absent südir özüng nung aliba ama temerenshi alitsü.

Sd/- N. Bendang Chairman **Sd/- Toshi Kichu Secretary**

RAJEMTSÜR

Tir Yimyim 25th June adok nung Aoyimkum village council-i "Sangdonger" ta ser adokba nung, özü jabaso Mr. Imlitoshi-i aibelenba atema Aoyimkum Village Council-i kechi temerenshi agütsür aji tim inyakogo ta agizüker. Iba dak sentakba nung, özü jabaso Mr. Imlitoshi tebu süadoker, ni pa anir Mr. Imlisunep Chuchuyimlang village den kibong aküm. Anungji Mr. Imlisunep-ji shitakba tebu masü 'Step Father' dang, tebu shitakbaji Lt. Imnawati Mongsenyimti village liasü. Anungji Imlitoshi-ji Chuchuyimlang nung masü-a ta rajemtsür.

Sd/- Mr. Imlitoshi S/o. Lt. Imnawati **Sd/- Mrs. Sashilila M/o. Imlitoshi**

**Office of the
AO SENDEN LITERATURE BOARD (ASLB)**

MOKOKCHUNG - 798 601, NAGALAND

Ref. No:ASLB/Gen-19/2022-2023

Dated: 26/06/2023

ASLB SANGDONG

Asen Ao oshi zülumen memedemba ajanga asen oshoben tejakleni maoba apijema/meteta Ao Senden Literature Board-i (ASLB) achaayanga 2006 nungi Ao oshi zülumen jangjashiyim tesayuba agüja arudagi aser sayua aruba ama tangbo zülumen aika lirumedema akümba ajiteter. Ano mapang apen zülumen renlokbaren inyaka arudang aiben tajungba aser tapetba (tetezüi agütsüba ama) küma yanglushia aor. Anungji ASLB ajanga maneni item tesayuba agüja arur.

School-tem nung Ao tesayurtem ajak iba zülumen jangjashiyim mapang shia agütsü nungdak ta angateta, taküma Chiteni (July) 4, 2023 anogo anepdang 10 ako nungi Ao Senden Conference Hall nung iba tesayuba agütsütsü sentong renema lir.

Anungji Government aser Private school koba nungsa Ao subject agir item (class A-12 tashi) ajak nungi Ao tesayurtem iba sentong nung arua adentsü metetdaksür.

Sd/- Dr. L. Temjen Jamir, Chairman **Sd/- I. Temjen Tzüdir, Secretary**

Nawaz Sharif ano Pakistan ato kilonser akumtsü akok



Islamabad, Aami/June 26

(Agencies): London nung Pakistan Muslim League (Nawaz) senden ka amenba ajanga par party lenir Nawaz Sharif election nung toktepa pezüben buba ato kilonser inyaksü lenmang lapoktsü.

Deobarnü Pakistan indang National Assembly nung bill ka agizüka özüng yanglurtem takum tepiyong atema tenokdangba agüja aliba küm pongu kumtsü, anungji taküm Pakistan general election agütsü lia Nawaz Sharif London nungi meyipa shilanga yimtenren nung shilem agütsü melar. Supreme Court ajanga 2017 küm arishi küm 73 tain Sharif ya takum tepiyong election nung shilem magitetsü obendang agüja liasü

aser mapang tatsüka lir accountability courts ajanga ochi mashi ken o tem nung aitsü.

Taoba hopta London nung PML-N senden ka amendang Ato Kilonser Shehbaz Sharif-i teti aser taoba ato kilonser Nawaz Sharif ajurua iba legislation ya benoka liasü. Iba senden nung Pakistan electoral politics-i Nawaz Sharif meyipa arutsü aser pa indang disqualification agientsü asoshi legislation yanglutsü benoktsü tasa yanglua liasü.

2018 küm Panama Papers ken o nung Supreme Court ajanga obendang agütsüba sülen asemben tashi ato kilonser inyaka alisang election nung tokteptsü metemtsüi akum.

Disqualification mapang

ajemtsüba den külemi Elections (Amendment) Bill 2023 yagi ano tir den shisa magitepi election anogo sangdongtsü asoshi Election Commission of Pakistan (ECP) nem tashi agütsür.

Özüng yanglurtem disqualification mapang atema iba bill ajanga Section 232 (Disqualification on account of offences) of the Election Act, 2017 nung amendment ka inoksem. Iba bill ya Senate nungbo June 16 nü agizükogo.

Iba bill ya özüng akumtsü asoshi tir-i agizüktsüla.

Pakistan Tehreek-e-Insaf-i bukumba Tir Arif Alvi ya Hajj atema linük nung mali, aser Senate chairman Sadiq Sanjrani-i tir mapa agizüka lir, anungji mapang meindoki iba bill ya agizüktsü akok.

Nawaz Sharif ya November 2019 nungi United Kingdom nung 'self-exile' nung alir. Pa nem Lahore High Court ajanga medical tsütsü bail magütsüdang Al-Azizia Mills ochimashi ken o nung küm tenet tepuokdak ayutsü obendang agütsüba ama pa tepuokdak liasü.

Russia defence minister-i Ukraine nung sepaitem semdang

Moscow, Aami/June 26

(Agencies): Wagner Group tekolakba Yevgeny Prigozhin-i Russia Defence Minister Sergey Shoigu dang pa mapa nungi anentsü khanga hopta tatemi Russia anema nokdakba sülen Shoigu Hombarnü mezüngbuba yimjak nung nguogo.

Shoigu indang ministry-i Hombarnü video ka lemsatepba nung pai Ukraine nung Russia nung sepaitem semdangba nguogo.

Iba video ya kodang tangok iba indang osang tejangja memetet, ajisüaka Wagner teloki Honibarnü Russia kübok Rostov-on-Don atsünga tenokdangba kecha maka amai Moscow leni aoba sülen tensa aziüoka lir ama sayutsü atema iba video lemsatep asütsü ta bilemer.

ochi mashi aser mapa abentsü atema temsü maliba military lenirtem atsüngtoktsü atema linük yimtiba leni ao, ajisüaka Kremlin den ajungbena tenangzüktepba ka yangluba sülen parnok Ukraine anütoklen parnoki atsünger aliba tesem kati meyipa oa iba inyakyim tembanga liasü. Kremlin aser Wagner telok na tsünga tenangzüktepba yangluba ya Belarus lenir Alexander Lukashenko-i achaayanga liasü.

Wagner tekolakbai Rostov-on-Don toktsür aoba sülen tenangzüktepba yangluba indang osang kar Kremlin, Lukashenko aser Prigozhin nungeri agütsüogo.

Iba tatalokba sülen Prigozhin aser pai aniba sepaitem tia koma asütsü iba indang mejangja, ajisüaka Wagner telok tekolakba aser Russia military na ita aika mangatetep adoka aruogo.

Hopta ishika tsünga pai Russia Ministry of Defence aija anogoshia amai video saya aruogo. Pai ashiba agi, lenirtem ya tetemtsü masü aser parnoki Ukraine nung pai aniba sepaitem nem teyari teperi magütsür.

Al Jazeera osangbener Yulia Shapovalova-i Moscow nungi ashiba agi, Prigozhin-i Wagner indang camp amakba atema Russia army aitsüba sülen Hokolbarnü pa anema criminal case ken o ka benokogo.

"Kremlin otongdar Dimitry Peskov-i osangbenertem dang ashiba agi, Prigozhin anema criminal ken o benoka aliba agintsü aser Prigozhin Belarus-i aotsü. Wagner telok nungi sepaitem shirnoki sorkar anema nokdakba nung shilem agiogo, parnok o mebandangtsü," ta lai ashi.

(Maneni tapak 8 nung...)

Sierra Leone opposition dak police temi tear gas khaloktsü

Freetown, Aami/June 26

(Agencies): Sierra Leone nung voters tem general election vote agütsür iba osang atatepa linük yimtiba, Freetown nung opposition party indang headquarters nung atatepa alidang police temi tear gas khaloktsü.

Opposition All People's Congress (APC) nungi tir candidate Samura Kamara-i Twitter nung ashiba agi, Deobarnü party headquarters telung nung pa indang office nung injang khaloktsü.

Opposition party headquarters nung tetsür ka kanga sashia yirur liasü aser azü jajaba meliasü, ta osang ajanga ashi. APC züngsem tejangja Yvonne Aki-Sawyer shiba Freetown mayor kümsük tanabuba inyaksü asoshi tokteper, paia Twitter nung noksa lemsatepba nung ki telung nung nisungtem atsüktepa aliba nguogo.

"Ni APC Party office nung lir aser onok dak injang khaloktsür," ta lai zülu.

Police temi sangdong ka nung ashiba agi, APC züngsemtem Freetown nung yimtung süa jaja nüburtem dang parnoki election nung takok nguogo ta sangdonga liasü.

Headquarters tezülen parnoki nisung aika aniten, aser item yagi parnok ajanga aortem merenshi, ta police temi ashi.

"Tensa tamajungba akumba ajanga lenmang nung nisungtem

merenshia aliba telok senshidaktsütsü mechi police temi tear gas khaloktsütsüsa akum," ta ashi.

Deobarnep linük tesem ajungalen vote züngtepa liasü, saka iba osang ano mesangdongi lir. Honibarnü tir, parliamentary aser municipal elections atema vote agütsüba timba yimjung nung liasü.

Saka district kar nung nüburtem election ketdangtsür dak teka sangshi, ta chief electoral commissioner Mohamed Konneh-i Deobarnü shia liasü.

Deobarnüsa Tir Julius Maada Bio'er Sierra Leone People's Party (SLPP) ajanga sangdong ka nung ashiba agi, APC lenirtemi polling agents dak teka sangshi.

Freetown nunga polling station kar nung mangatetep adoka liasü, ta Honibar nikongdang opposition party züngsem kari ashi.

Bodhbarnü Freetown nung nisung 66 apu, ta police temi ashi. APC ajanga ashiba agi, parnok bukumer tem yimjak yimtsüng nung nübu yima jajaba mapang timtem ajurua liasü.

Tir atema tebur 12 aser tetsür ka tokteper, saka tang teinyakdak Bio atema tetsükdaktsü tulutibaji APC nungi Kamara lir. 2018 election nung Bio-i tera agi Kamara madak takok ngua liasü.

Tir candidate temi mezüng round nung takok angutsü asoshi vote tejangja shilem 55 angutsüla.



Department of Youth Resources & Sports-i ayongzüka Indira Gandhi Stadium Kohima nung 1buba Women Football League June 26 nü tenzükogo. Iba asayamung nung Football Association Phek District, Khelo India State Centre of Excellence (KISCE), Peren District Women Football Club (PDW FC), Northern Angami Youth & Sports Association (NAYSA)-C aser Hilly Girls Football Club (B Team of IG Stadium) nungeri shilem agidar. Iba asayamung ya July 1 nü tashi asayatsü.

'Ochi obendang mangu tashi raratsü': Wrestlers

Aami/June 25, 2023

(Agencies): WFI tekolakba anema yimtung nung maneni longkak aittsü ako ta ashiba sülen longkak aita aliba wrestler temi Deobarnü ashiba agi, Brij Bhushan Sharan Singh anema yimtung nung masü saka okadak raratsü.

Vinesh Phogat, Sakshi Malik aser Bajrang Punia nunger ajaki iba dak sendakba nung tweet süogo, kong parnok, Singh anema chargesheet ka benoka sorkari tenangzükba ataloktsüogo, ta ashi.

"Iba dak sendakba nung ochi obendang mangu tashi wrestlers temi nokdaksü ajisüaka yimtung nung masü okadak raratsü," ta

parnoki tweet asü.

"WFI nung temelenshi, election inyakyim dak sendakba nung nangzükba ama inyaksangshi tenzükogo. July 11 nü election agitsü aliba dak sendakba nung srokari tenangzükba ama inyaksü menyaksü aji ata alitsü," ta parnokisa shisem.

Iba osang lemsatepba sülen Vinesh aser Sakshi nati tena anogo ishika social media nungi pila alitsü ta tweet asü.

Honibarnü social media nung live sensaksemba mapang Vinesh, Sakshi aser Bajrang nungeri, taoba mapang wrestler aser BJP lenir Yogeshwar Dutt-i, parnok nem Asian Games

trials nungi taitok agütsütsü atema IOA ad-hoc panel-i telemetba agiba ashishiba asoshi aitsüogo.

Parnokisa, Singh anema maneni raratsü aser pa anema benokba chargesheet asadangba sülen koda raratsü iba indang asadangtsü ta ashi.

Jantar Mantar nungi May 28 nü aninba sülen wrestlers temi parnok longkak aita sentong June 15 nü tashi thinena liasü, kechiyong Sports Minister Anurag Thakur-i, Singh anema chargesheet ka benoktsü aser par kinungertem WFI election nung tokteptsü atema memelatsü ta tenangzükba agüja liasü.

Goswami, Morgan & Knight nunger MCC World Cricket Committee nung denogo



New Delhi, Aami/June 26

(Agencies): India tsürtem ronnungi nungtugu cricket asayar Jhulan Goswami, England tetsür team captain Heather Knight aser 2019 ODI World Cup akokba England team captain Morgan nunger Hombarnü MCC World Cricket Committee (WCC) nung denogo, ta Marylebone Cricket Club sangdong ka ajanga metetdaksü. Lords nung Committee senden amentsü lia parnok asem iba telok nung densemogo.

Iba committee ya independent body ka lir, kong taoba mapang asayartem, tang tasayadak aliba asayartem, umpire tem aser linük balala nungi ketdangsürtem densema lir.

Goswami ya tetsür cricket asaya nung ball takaratiba aonba asayar ronnung ka ta züngshir aser la taoba küm international cricket asaya nungi anenogo. La tatemsa England den Lord's nung ODI ka asaya liasü, kong la nem guard of honour ka agütsü.

Goswami küm 20 shi asayaogo aser iba mapang lai

white-ball asaya 272 nung wicket 300 dak tema agi aser Test asaya 12 nung wicket 44 agia liasü.

La taküm küm April ita MCC indang Honorary Life Member ka kümdaktsüogo.

"World Cricket committee-i Jhulan, Heather aser Eoin nunger palashishia jaoker," ta MCC World Cricket committee mendenbuba Mike Gatting-i ashi.

"Parnok asem ya international jenjang nung temaba jenjang nung asayaba asayartem lir aser temaba jenjang nung cricket asaya koda inyaksangshir iba dak sendakba nung parnok asem shisatsü ya committee atema kanga tajanzük asütsü.

"Tawa tetsür cricket asaya kanga renloka aoba sülen ano tongtibang kaji committee nung tetsür züngsemtem timba kümdar. Jhulan aser Heather na Clare Connor aser Suzie Bates na den denogo," ta pai ashi.

WCC pur England aser Australia na tanabuba Ashes Test asaya metenzük tsüingda Lord's nung Hombar aser Mongolbarnü senden amentsü.

Modric aser Real Madrid na tenangzüktepba yanglushi

New Delhi, Aami/June 25

(Agencies): Real Madrid nungi midfielder tejen Luka Modric-i club den tenangzüktepba tasen ka yanglushiogo aser pa 2024 küm June ita tashi asayatsü, ta club sangdong ka ajanga Hombarnü metetdaksü.

Modric den tenangzüktepba yanglur aliba iba ita tembangtsü liasü aser pa Saudi Arabia nung club temi alizüktsü asoshi tejangraba liasü, ajisüaka arishi küm 37 tain asayar yagi Madrid nungi dang asayatsü atema telemetba agiogo.

Croatia nunger asayar ya team nung kanga tongtibang asayar ka lir aser Toni Kroos, Dani Ceballos aser Nacho Fernandez

nungeri club den tenangzüktepba yanglushiba sülen pai iba jenjang agiogo. "Club nungi season 11 asayaba mapang pai asaya 488 nung shilem agiogo aser takok marnok 23 koktetogo," ta Real Madrid-i ashi.

2012 küm Tottenham nungi Madrid nung oa adenba sülen Modric-i Champions League pongu, La Liga asem aser Copas del Rey ana ben kokogo.

Pa September ita arishi küm 38 ajungtsü aser 2018 küm Ballon d'Or ngur alisang ya team nung jenjang ka asoshi tetokteper aika kümogo.

Madrid-i, Borussia Dortmund nungi euro million 100 dak tema yong Jude

Bellingham alizükogo aser kasa mapang nung team nung midfield asayar Kroos, Ceballos, Eduardo Camavinga, Aurelien Tchouameni aser Fede Valverde nunger densema lir.

Bellingham-i pa club nung anikoba sentong nung o jembiba mapang, asayartem aser talisa Modric aser Kroos na nungi angazüktsü yongya atar ta ashi.

Croatia team nungi asayaba mapang Nations League nung Modric tanabuba jenjang nung tembang aser pa international asaya nungi kodang anentsü mesüra pa 2024 European Championship tashi asayatsü masayatsü iba indanga kecha mashi.

Russia defence minister-i Ukraine...

(Tapak 7 nungi...)

Ajisüaka Hombarnü Russia media sangdong balala ajanga ashiba agi, Federal Security Service-i maneni Prigozhin inyakyim bushisüingdangdar.

"Prigozhin tang kong jenoka ali iba indang mejangja," ta Shapovalova-i ashiba den Wagner tekolakba ya tashi mangaba atema-a aitsütsü akok, ta shisem.

Shoigu Hombarnü yimjak nung inyaksangshiba ajanga pa mapa nungi anentsü akok ta bilema aliba osang temseptsütsü imlar. Ajisüaka ministry of defence nung mapa

melenshitsu asü memelenshitsu iba indang ashitsu tasak lir, ta laisa shisem.

Prigozhin-i mapangshia Shoigu aitsüogo, ajisüaka pai Russia tir anemabo indang indanga mejembi-i arudar.

Ajisüaka Russia anema nokdakba ya Puti asoshi tebilemstü ka ama züngshir, shiba Russia nunger lenir ama küm 20 tashi inyakba mapang tang tashi nung shingaiya yamai amokmerena mali.

Honibarnü osangbenertemi Putin-i Shoigu dak tamang akar

makar ta asüingdangba mapang, tir yimya yimpong melenshiba ni kecha merprangteter ta Peskov-i ashi. Kasa mapang nung United Kingdom-i ashiba agi, iba tatalokba ajanga Ukraine tali tashi itdaksüogo.

Tanga anüolen aliba linüktemia, Wagner teloki Russia anema nokdakba ajanga Russia tia metetdaksüogo, ta ashi. US broadcaster NBC den sensaksemba mapang US Secretary of State Antony Blinken-i iba tatalokba ya khenyongi balaka ta ashi.

BILEMDANGANG

"Nai tematiba jenjang tongnüra, teküpoktiba nung tenzükang."